

18 FEB 2004

Sukan-Regata

60 PERAHU LAYAR SAH SERTAI REGATA TROFI CABARAN

LANGKAWI, 18 Feb (Bernama) -- Sebanyak 60 perahu layar termasuk dari

Australia, New Zealand, Singapura, Thailand dan Malaysia mengesahkan penyertaan mereka dalam Trofi Cabaran Perdana Menteri dan BMW Royal Langkawi International Regata 2004 di sini, mulai 1 hingga 6 Mac.

Penganjur regata Langkawi Yacht Club, dalam satu kenyataan di sini hari ini berkata penyertaan masih dibuka sehingga 29 Feb bagi membolehkan lebih ramai peserta menyertai saingan itu.

Pelayar-pelayar akan merebut dua trofi -- Trofi Cabaran Perdana Menteri dan Piala Komodor Langkawi Yacht Club, menurut kenyataan itu.

Bekas Perdana Menteri Tun Dr Mahathir Mohamad dijangka menutup dan menyampaikan hadiah kepada para pemenang.

Tahun lepas, sebanyak 63 perahu layar menyertai regata itu.

Sementara itu, Tentera Laut Diraja Malaysia (TLDM), yang mewakili Angkatan Tentera Malaysia (ATM) akan menghantar dua pasukan ke regata itu.

Setiausaha Persatuan Perahu Layar ATM, Lt Mohamed Hamdan Mohamed Shamsuddin berkata 10 pelayar TLDM akan mengemudikan dua buah kapal jenis

Farr Platus 25 untuk bersaing dalam acara kelas sport.

Pelayar Kebangsaan, Lt Malik Sulaiman yang pernah memenangi pingat perak pada Sukan Asia 1998 di Thailand akan mengetuai cabaran ATM, katanya.

-- BERNAMA

ZI SN RON